

A young green plant with several long, narrow leaves is growing out of a patch of cracked, dry, brown earth. The cracks in the soil are deep and irregular, forming a network of polygonal shapes. The lighting is bright, casting shadows from the plant and the cracks in the soil.

HOE

KAN 'N GEMEENTE

GROEI?

DANIE NELL

HOE KAN 'N GEMEENTE GROEI ?

Om hierdie vraag te antwoord gaan ek die volgende met jou bespreek

- **God wil geestelike asook getalle groei sien in Sy Kerk. 4**
- **Daar is 9 dinge wat God gebruik het om Sy eerste gemeente in Jerusalem te laat groei. (Hand. 2) 8**
- **Ek wil jou wys wat gemeentes in 'n streek laat groei het (Hand. 9) 13**
- **Ons gaan kyk hoe Efese van 'n klein gemeente gegroei het na 'n groot gemeente. (Hand. 19) 14**
- **Waarom ons (as gemeente) God se Koninkryk moet verstaan ? 16**
- **Die belangrikheid van "Bedieninge" in gemeente groei 27**
- **Watter rol speel Lofprysing en Aanbidding in groei ? 33**
- **Wat van Gebed ? 39**
- **Is daar nog beginsels wat ons moet weet sodat ons as gemeente kan groei ? 40**

Voorwoord

Hierdie is 'n boekie wat aan jou praktiese raad sal gee sodat jou gemeente geestelik asook met getalle sal groei.

Maar jy moet verstaan dat dit alleenlik sal plaasvind as jy as lidmaat bereid sal wees om ook geestelik te groei.

***Past. Danie Nell
Jeffreysbaai
dnell@inetcom.co.za***

GOD WIL GEESTELIK ASOOK GETALLE **GROEI SIEN IN SY KERK**

Elke gemeente behoort geestelik maar ook in getalle te groei. Dit is natuurlik so dat alles wat God geskape het sal groei. As 'n egpaar nie kinders het nie raak hul bekommerd en as hul wel 'n baba het en hy groei nie, neem hulle hom na 'n dokter toe om vas te stel waarom daar nie groei plaasvind nie. Hoeveel te meer behoort daar groei te wees in God se gemeente wat tog Sy liggaam is.

DIT IS GOD WAT LAAT GROEI.

In 1 Kor.3:6-7 skryf Paulus: "Ek het geplant, Apollos het natgemaak, **MAAR GOD HET LAAT GROEI**. So is dan hy wat plant of hy wat natmaak, niks nie, **MAAR GOD WAT LAAT GROEI**"

Wie plant en wie maak nat ? (Jy en ek of GOD?)

'n Verdere vraag: Wie plaas die hande op die een wat siek is?

Die antwoord is natuurlik: "Ons" Lees gerus:

Mark. 16:18 "...op siekes sal julle die hande lê, en hulle sal gesond word."

Luk.10:19 "Maak die siekes gesond"

TWEE DINGE IS NODIG VIR GROEI.

1. Daar moet GEPLANT word.

Dit verwys na EVANGELISASIE. Ons moet nie dink 'n gemeente sal maar net nuwe siele by kry as God se Woord nie geplant word in harte nie. Miskien moet ons **Mark. 16:20** meer duidelik verstaan.

Living Bible: "And the disciples went everywhere preaching, and the Lord was with them and confirmed what they said by the miracles that followed their messages."

2. Daar moet VERSORGING plaasvind.

Persoonlik is ek van mening dat elke lidmaat besig moet wees met een (of albei) van bogenoemde, nl. Om te "**plant**" of om te "**versorg**". Volgens 1 Kor.3:6 laat God groei dit wat ons plant en ook dit wat ons natmaak.

Die klag teen die herders : Eseg.34:4 "Julle versterk die swakkes nie, en maak die siekes nie gesond nie, en die wat gewond is, verbind julle nie, en wat weggedryf is, bring julle nie terug nie en wat verlore is, soek julle nie "

DAAR IS DRIE DINGE VANDAG IN DIE KERK WAT GROEI VERHINDER

1 Kor. 3:1-3 "En ek, broeders, kon met julle nie spreek soos met geestelike mense nie, maar soos met vleeslike, soos met klein kinders in Christus. Ek het julle met melk gevoed, nie met vaste spys nie, want julle was nog nie daartoe in staat nie, en julle is nou nog nie daartoe in staat nie, omdat julle nog vleeslik is; want aangesien daar onder julle **jaloersheid** en **twis** en **tweedrag** is, is julle nie vleeslik nie en wandel julle nie na die mens nie ?"

JALOERSHEID !

Ons kan natuurlik ook geestelik jaloers raak op mekaar deur nie ander gelowiges voorspoed te gun nie of te erken dat die hand van die Here op my broer en suster in 'n sekere taak rus nie.

TWIS !

Hoor wat leer Paulus hieroor:

1Tim.3:3 Paulus sê as ons in geestelike leierskap wil staan dan moet ons “geen vegter, geen vuilgewinsoeker, geen strydlistige” wees nie.

Dan voeg hy die volgende woorde by in **2 Tim.2:24** ”n Dienskneg van die Here moet nie twis nie”

TWEEDRAG !

Dit meen om mense van mekaar te skei Die “vleeslike mens” in God se gemeente openbaar altyd hierdie eienskappe.

Hoor wat sê Paulus in Rom.8:6-8 *“Want die wat vleeslik is, bedink vleeslike dinge, maar die wat geestelik is, geestelike dinge. Want wat die vlees bedink, is die dood, maar wat die Gees bedink, is lewe en vrede, omdat wat die vlees bedink, vyandskap teen God is; want dit onderwerp hom nie aan die wet van God nie, want dit kan ook nie.”*

GROEI IS EINTLIK DIE ENIGSTE BEWYS DAT DAAR LEWE IS.**Daar is drie stadiums van Groei.**

1. Die wortelstelsel wat die plant vestig. Dit kan nie gesien word nie.
2. Die stam en blare wat gesien kan word.
3. Die vrugte wat gebruik kan word. Vrugte was nooit bedoel om as 'n versiering vir die boom te dien nie.

Die afwesigheid van groei dui aan dat daar 'n probleem area in so 'n mens se lewe is. Dit het treffend tot my gesprek toe ek 'n dogtertjie ontmoet het met een kort armpie. Haar handjie was volkome reg, maar haar armpie was uit verhouding kort .

Geen meubelstuk kan geval groei nie. Dit kan net mooi lyk. Daar is baie lidmate wat ongelukkig net “mooi lyk” in gemeentes. Geestelik het hulle gestagneer en groei het lankal opgehou.

Gelukkig kan God “DOOIE HOUT” laat lewe. Dink aan Aaron se staf (Num.17:8). Tussen die ander twaalf stawwe was dit net syne wat gebloei het en vrugte gedra het.

By God is alle dinge moontlik. Daarom kon die dooie bene in Eseg.37 weer opstaan as 'n magtige leer vir God.

DINK AAN 'N BABA. 'n Baba is volkome geskape by geboorte. Geen liggaamsdeel kom later by nie. Dit is 'n liggaam volkome saamgestel maar nie volkome in ontwikkeling nie.

HOE HET PAULUS EN APOLLOS GEWERK IN KORINTE ?

Paulus het geplant; dit lees ons in Hand.18:7-11 “En hy het daar gebly ‘n jaar en ses maande lank en die woord van God onder hulle geleer.” (vers 11)

Dit is treffend dat selfs in daardie tyd het almal nie tot bekering gekom in kerkgeboue nie maar in huise. In hierdie geval nogal in die huis langs die kerk. God wil ons weer na die “Kerk in die huis” neem.

Ek het verneem van ‘n Fillipynse kok op ‘n boot en sy vrou wat werk as sekretaresse en hoe hul jaarliks spaar om ‘n huisie in die Fillipyne te koop om dan ‘n selkerk in daardie huis te plant. Deur die jare heen het hulle sodoende ‘n hele paar huise gekoop en selkerke geplant.

Apollos het weer “natgemaak” deur meer uit die woord te leer, aangesien hy magtig in die skrifte was. (Hand. 18:24-28)

HOE HET DIE EERSTE KERK GEGROEI ?

Hand. 2:41 en 47 *“Die wat toe sy woord met blydschap aangeneem het, is gedoop; en daar is op die dag omtrent drieduisend siele toegebring..... En die Here het daagliks by die gemeente gevoeg die wat gered is.”*

Hand. 4:4 *“En baie van die wat die woord gehoor het, het geglo; en die getal van die manne het omtrent vyfduisend geword.”*

Hand. 5:14 *“En daar is meer en meer gelowiges in die Here bygevoeg, menigtes van manne en vroue,....”*

Hand. 6:7 *“En die woord van God het toegeneem, en die getal van die dissipels het in Jerusalem baie vermeerder, en ‘n groot menigte van priesters het gehoorsaam geword aan die geloof.”*

Hand. 9:31 *“En die gemeentes deur die hele Judea en Galilea en Samaria het vrede gehad; en terwyl hulle opgebou is en gewandel het in die vrees van die Here en die vertroosting van die Heilige Gees, het hulle vermeerder.”*

Hand. 9:35 Toe Petrus Eneas die lam man genees het in die Naam van Jesus, lees ons:
“En al die inwoners van Lidda en Saron het hom gesien en hulle tot die Here bekeer.” (Twee dorpe kom tot bekering as gevolg van hierdie genesing.)

Hand. 11:21 *“En die hand van die Here was met hulle, en ‘n groot getal het gelowig geword en hulle tot die Here bekeer.”* (Dit was in Antiochië.)

Hand. 16:5 *“En die gemeentes is versterk in die geloof en het elke dag vermeerder in getal.”*

Hand. 21:17-20 Paulus vertel die ouderlinge in Jerusalem van al die wonderlike dinge wat die Here oral gedoen het en in **vers 20** lees ons die woorde: *“En toe hulle dit hoor, het hulle die Here verheerlik en vir hom gesê U sien, broeder, hoeveel duisende Jode daar is wat gelowig geword het, en almal is weraars vir die wet.”*

Die boek Handeling is 'n wonderlike boek

Wanneer jy Handeling bestudeer moet jy altyd onthou dat die eerste sewe hoofstukke die geskiedenis gee van wat in Jerusalem plaasgevind het.

Eers vanaf hoofstuk 8 word die evangelie verder as Jerusalem se grense geneem as gevolg van 'n *“groot vervolging teen die gemeente in Jerusalem”* (Hand. 8:1)

Jy sien, die gelowiges wou bly in Jerusalem (omdat dit die plek was waar God op daardie stadium gewerk het) maar God het 'n vervolging toegelaat sodat die evangelie die res van die wêreld kon bereik. Baie keer moet die Here dieselfde doen met jou en my, veral as ons vashou aan dit wat ons het en nie bereid is om deur Sy Gees gelei te word en die evangelie na ander te neem nie.

DAAR IS 9 DINGE WAT GOD GEBRUIK HET OM SY EERSTE GEMEENTE IN JERUSALEM TE LAAT GROEI (Hand. 2)

Die skrif waarna ek verwys is: Hand. 2:42-47

“En hulle het volhard in die leer van die apostels en in die gemeenskap en in die breking van die brood en in die gebede. En vrees het op elkeen gekom, en baie wonders en tekens het deur die apostels plaasgevind. En almal wat gelowig geword het, was bymekaar, en het alles gemeenskaplik besit. En hulle eiendomme en besittings het hulle verkoop en die opbrings onder almal verdeel, volgens wat elkeen nodig gehad het. En dag vir dag het hulle eendragtig volhard in die tempel en van huis tot huis brood gebreek en hulle voedsel met blydskap en eenvoudigheid van hart geniet, terwyl hulle God geprys het en in guns was by die hele volk. En die Here het daaglik by die gemeente gevoeg die wat gered is.”

1. Hulle geestelike fondasie was die gesonde lering wat hul ontvang het van die apostels.

Vers 42 lees: “En hulle het volhard in die leer van die apostels.”

The Living Bible het hierdie teks soos volg vertaal: “They joined with the other believers in regular attendance at the apostles’ teaching sessions.”

Indien ‘n gemeente gesonde “*woord prediking*” ontvang, sal dit dien as ‘n fondasie waarop lidmate geestelik kan bou.

Die leiers moet toesien dat hulle nie net mooi preke preek nie, maar God se woord met entoesiasme aan die lidmate bring, want God sal net Sy woord bevestig.

Mark. 16:20 se vertaling in Die Lewende Bybel lees soos volg: “*Die dissipels het toe orals vir mense hierdie boodskap (die evangelie) gaan vertel. Waar hulle dit vertel het, het die Here ook gewerk, en deur die wonderwerke wat daar gebeur het, het Hy ook bewys dat die boodskap waar is.*”

God sal net Sy ware woord bevestig, daarom moet ons seker maak dat dit so verkondig word.

In Januarie 2006 het ek 300 predikante en leiers (wat meer as 200 gemeentes verteenwoordig) gevra wat hul mening is aangaande prediking. Die antwoord wat ek terug ontvang was:

- 99% het gesê dat die prediking in die gemeente moet die behoeftes van die mense aanspreek
- 100% het gesê dat die prediking moet Bybels gevondeerd wees. M.a.w. Die prediking moet uit die woord van die Here kom en nie net sede-preke wees nie.

2. **Hulle het gemeenskap (fellowship) met mekaar gehad.**

Vers 42 “hulle het volhard....in die gemeenskap en in die breking van die brood....”

Die Nuwe Vertaling praat van “Onderlinge verbondenheid” .

Om te “fellowship” is belangrik vir groei in enige gemeente.

Daar is vandag baie eensame lidmate wat smag dat hul medegelowige hul net sal raaksien.

Die Lewende Bybel stel dit so: “Hulle het veral gekonsentreer op die maniere waarop hulle mekaar kon help en die maaltye waar hulle ge-ëet het.”

Hoekom eet ons so min saam ?

Maaltyd met mekaar is ook ‘n manier hoe ons kan “fellowship”

3. **Hulle het volhard....in die gebed.” (Vers 42)**

‘n Gemeente sal groei as hulle kan bid !

Ons lees in Hand. 4:31 hierdie woorde: “**En toe hulle gebid het, is die plek geskud waar hulle saam was, en hulle is almal vervul met die Heilige Gees en het die woord van God met vrymoedigheid gespreek.**”

As ons lees vanaf hierdie vers tot by Hand. 5:14, sal ons vind dat daar sewe dinge is wat gebeur het in die eerste gemeente van Jerusalem omdat hulle gebid het.

- Die plek was geskud deur God (Hand. 4:31)
- Hulle was almal vervul met die Heilige Gees (Hand. 4:31)
- Hulle het groot vrymoedigheid ontvang (Hand. 4:31)
Vrymoedigheid het altyd ‘n groot beloning (Heb. 10:35)
- Hulle was een van hart en siel en nie een het gesê dat sy besitting sy eie was nie, omdat hulle alles gemeenskaplik besit het (Hand. 4:32)
- Omdat hulle gebid het, was die gemeente gesuiwer van ‘n man en vrou wat “gelieg” het vir die Heilige Gees. (Hand. 5:1-11) As ‘n gemeente bid sal God sorg dat die verkeerdie goed onder ons geopenbaar en verwyder word.
- Daar het wonders en tekens plaasgevind ((Hand. 5:12-16)
- God het meer en meer gelowiges bygevoeg (Hand. 5:14)

Jak 5:16 “*Die vurige gebed van ‘n regverdige het groot krag.*”

4. **Hulle het wonders en tekens ondervind. (Vers 43)**

Ek glo dat wonders en tekens weer gemeentes sal laat groei.

God het wonders en tekens in die verlede gebruik en sal dit weer gebruik.

Die ou argument dat mense kerk toe kom net vir die “vis en die brood” is eintlik geen argument nie, omdat God juis die mens wil ontmoet op sy vlak van nood. Jesus se bediening was vol daarvan. Mense het wil gekom ook vir die “vis en die brood” maar is ook geestelik en liggaamlik aangeraak en herstel.

Lees gerus weer met aandag die volgende skrifte:

Hand. 5: Vers 12: “En deur die hande van die apostels het daar baie tekens en wonders onder die volk plaasgevind;”

Verse 14-16: “En daar is meer en meer gelowiges in die Here bygevoeg, menigtes van manne sowel as vroue, sodat hulle die siekes op die strate uirgedra en op bedde en draagbare gelê het, met die bedoeling dat, as Petrus kom, al was dit net sy skaduwee op iemand van hulle sou val. En die menigte van die stede in die omtrek het ook in Jerusalem bymekaargekom en siekes gebring en mense wat deur onreine geeste gekwel was; en hulle is almal genees.”

Hand. 9: Verse 32 tot 35: “En onderwyl Petrus oral rondgaan, het hy ook gekom by die heiliges wat in Lidda woon; en hy het daar ‘n man gevind met die naam van Eneas, wat al agt jaar bedlêend en verlam was. En Petrus sê vir hom: Eneas, Jesus Christus maak jou gesond; staan op en maak jou bed op! En hy het dadelik opgestaan. En **al die inwoners** van Lidda en Saron het hom gesien en hulle tot die Here bekeer.”

Hand.19: Verse 11,12,18 en 20 “En God het buitengewone kragte deur die hande van Paulus gedoen, sodat selfs wanneer doeke of voorskote wat aan sy lyf was, op die siekes gelê is, die siektes van hulle gewyk en die bese geeste van hulle uitgegaan het.....
En baie van die wat gelowig geword het, het belydenis kom doen en hul dade bekend gemaak;..... So het die woord van die Here met krag gegroei en sterk geword.”

Tans loop Argentinië oor van wat God doen! As gevolg daarvan het klein gemeentes (van 30 tot 100 lidmate) gegroei na selfs duisende, ja tot 20 000 en 70 000 lidmate.

5. **Hulle het alles gemeenskaplik besit.** (Verse 44 en 45)

Dit was so belangrik vir hulle as gemeente dat ons weer daarvan lees in Hand 4:32 “En die menigte van die wat gelowig geword het, was een van hart en siel, en nie een het gesê dat iets van sy besittings sy eie was nie, maar hulle het alles in gemeenskap gehad.”

Die “Amplified” Bybel stel dit so: “Not one of them claimed that anything which he possessed was (exclusively) his own, but everything they had was in common and use of all.”

Kom ons besluit opnuut:

“ONS SAL VIR MEKAAR OMGEE EN MET MEKAAR DEEL WAT ONS HET !”

6. **Hulle het daagliks die Tempel besoek.** (Vers 46)

As ons wil sien dat ons gemeente groei dan moet ons mense nie in die gewoonte kom soos ons lees in Heb 10:25 nie. Hier lees ons die volgende: *“en laat ons ons onderlinge byeenkoms nie versuim soos sommige die gewoonte het nie, maar laat ons mekaar vermaan, en dit des te meer namate julle die dag sien nader kom.”*

Die publiek sal ons dienste wil besoek as hulle agter kom dat ons entoesiasies is oor ons kerkdienste. As ons traag is om te gaan hoe verwag ons dat hulle sal kom ?

Daar is te veel DUIKBOOT christene in gemeentes. Dit is dié mense wat net nou en dan “opkom” om net te wys dat hulle nog in die omgewing is.

7. **Hulle het van huis tot huis brood gebreek.** (Vers 46).

Hulle het nagmaal in mekaar se huise gevier en maaltye saam geniet as gelowiges.

The Living Bible stel dit soos volg: “They met in small groups in homes for communion, and shared their meals with great joy and thankfulness.”

8. **Hulle het geweet wat dit was om God te prys.** (Vers 47)

Dit was nie net in hul dienste nie, maar vir die eerste KERK was dit ‘n LEEFWYSE.

ONS KERKE SAL VANDAG OORLOOP AS LOFPYRSING AAN DIE HERE OOK VIR ONS ‘N LEEFWYSE IS.

Wat ons dienste betref behoort die sang en musiek “lewendig en opgewek” wees, met ‘n toegewyde aanbiddingspan, wat maar gerus ou en nuwe liede kan vermeng in die lof en aanbidding.

Kerkdienste moet inspirerende ondervindings vir ons mense wees.

Die hoofdoel van enige aanbidding in die kerk moet wees om die lidmaat te neem in die teenwoordigheid van God. Die aanbiddingspan gee nie ‘n vertoning van sang en musiek nie maar is aanbidders wat ander inspireer om God ook te aanbid.

9. **Hulle het guns by al die mense gehad.** (Vers 47)

Die Bybel sê dat *“hulle in guns was by die hele volk.”*

Ons sal hierdie wêreld vir God wen indien ons guns by mense kan kry.

Dit beteken nie ons moet ‘n kompromie met die wêreld aangaan nie, maar ons moet op ‘n manier met mense buite die kerk kommunikeer wat hulle sal trek na God toe en nie wegdryf nie.

Die Lewende Bybel gebruik hierdie woorde: *“Die hele volk het ‘n goeie opinie van hulle gehad.”*

Die Boodskap stel dit weer soos volg: *“Die gelowiges se lewenstyl het die ander mense in Jerusalem baie beïndruk. Almal het daarvoor gepraat. Daarom het daar elke dag baie mense tot geloof in Christus gekom.”*

Ons het soms verkeerde persepsies, soos: "Almal moet my haat omdat ek 'n Christen is.

Ons oorbeklemtoon tekse soos: Joh. 16:33 en 2 Tim. 3:12)

EK GLO DAT GOD ONS GUNS WIL GEE IN ONS GEMEENSKAP.
MAAR DAN MOET ONS NIE DIE PUBLIEK AANVAL MET AGGRESSIE
NIE. ONS HET IMMERS 'N "GOEIE BOODSKAP" NAAMLIK DIE
EVANGELIE.

EK WIL JOU WYS WAT GEMEENTES IN 'N STREEK LAAT GROEI HET (Hand. 9)

In **Hand. 9:31** is daar 'n treffende vers wat jy moet raaksien. Dit lees soos volg:
*“En die gemeentes deur die hele Judéa en Galiléa en Samaría het vrede gehad; en terwyl hulle opgebou is en gewandel het in die vrees van die Here en die vertroosting van die Heilige Gees, **het hulle vermeerder.**”*

Gemeentes in 'n dorp, stad of selfs in 'n streek moet kennis neem van hierdie teks, indien hulle wil groei. God het dit in die Bybel geplaas sodat ons kennis kan neem wat nodig is indien ons groei wil sien. Kom ek probeer dit in praktiese woorde vir jou vertel wat ek dink daar gebeur het:

Die eerste ding wat ons is lees is dat hulle “vrede” gehad het.

Ja vrede onder mekaar in hul gemeente en ook vrede met ander gemeentes. Maar een ding staan soos 'n paal bo water en dit is dat jy nie kan vrede gee of maak as jy dit nie besit nie.

Die tweede punt wat ons verneem uit hierdie teks is dat hulle “opgebou” was. M.a.w hulle het nie mekaar “afgebreek” nie. Een ding wat baie afbrekend in kerke vandag is, is die tong. Maak gerus weer 'n studie van wat Jakobus ons leer rakende die tong in Jak. 3.

As ons gedurig mekaar afbreek en kritiseer moet ons nie verwag daar sal enige geestelike groei in ons lewens asook in ons gemeentes wees nie.

Die derde saak wat hier so duidelik uitgelig word is dat hulle:

“gewandel het in die vrees van die Here”

Jy sal saamstem dat die vrees (respek) vir God sal moet terugkom in die kerk. Want as daar 'n heilige vrees vir God is sal ons mense nie so maklik sondig nie, en dan sal geestelike groei nie 'n probleem wees nie.

Hulle het “gewandel in die vertroosting van die Heilige Gees”

Dit is net die Heilige Gees wat werklik kan vertroos, lei en inspireer.

Indien 'n gemeente (of gemeentes) dit nie ervaar nie sal gebrokenheid in mense nie geheel kan word nie en sal ons ontbreek aan werklike passie om te doen wat God verlang ons moet doen.

Ons teks sluit af met die treffende woorde: *“het hulle vermeerder”*

As ek dit reg verstaan, het al die voorafgaande dinge eers gebeur en as gevolg daarvan het die vermeerdering en groei natuurlik plaasgevind. Groei behoort altyd iets natuurlik te wees, maar dan moet alles wat die groei moet stimuleer in plek wees. Ek hoop hierdie geselsie met jou oor Hand. 9:31 het jou gehelp ?

ONS GAAN KYK HOE EFESE VAN 'N KLEIN GEMEENTE GEGROEI HET TOT 'N GROOT GEMEENTE (Hand. 19)

Efese was 'n pragtige stad in Galasië. Vandag praat ons van Turkye. Dit was 'n afgodstad waar die inwoners geglo het Diana, hul afgod, het uit die hemel geval. Die grofsmede het groot inkomste gemaak uit al die beeltjies van Diana wat hul verkoop het.

Dit word vertel dat die heidense tempel van Efese 'n duisend prostitute gehad het en in die tempelgebied het hul hul sondige bedryf beoefen.

Geskiedskrywers beweer dat die gemeente van Efese gegroei het tot 10,000 lidmate. Ek wil nie hierdie stelling probeer verdedig nie, omdat ek nie kan nie. Ek lees egter die volgende woorde in **Hand. 19:20** *“So het die woord van Here met krag gegroei en sterk geword.”*

Die eerste twintig verse van Hand. 19 is waaroor ek met jou wil gesels en jou dan wys wat God gebruik het om in hierdie sondige stad 'n pragtige gemeente te vestig.

Daar is vier dinge wat Efese laat groei het van 'n gemeente met omtrent twaalf manne tot 'n dinamiese gemeente.

Die eerste is dat God hul gevul het met Sy Gees

Toe Paulus die gemeente ontmoet het hy skynbaar nie getwyfel dat hul gelowiges is nie maar hy moes agter kom dat hulle nog nie die Heilige Gees ontvang het nie, daarom vra hy in vers 2: *“Het julle die Heilige Gees ontvang toe julle gelowig geword het ? (sien, hy het nie getwyfel aan hul geloof in God nie) En hulle antwoord hom: Ons het nie eens gehoor dat daar 'n Heilige Gees is nie.”*

Nadat hy sekere dinge aan hulle verduidelik het, lees ons die volgende in die sesde vers: *“En Paulus het hulle die hande opgelê, en die Heilige Gees het op hulle gekom, en hulle het met tale gespreek en geprofeteer.”*

Indien 'n gemeente wil groei moet hulle weet dat dit noodsaaklik sal wees dat God se Gees die lidmate moet vul sodat hulle meer effektief deur God gebruik kan word. Jesus het tog immers vir die eerste dissipels op Pinksterdag gesê dat hulle krag sal ontvang wanneer die Gees op hulle kom en dan sal hulle getuies kan wees vir Sy koninkryk. (Hand. 1:8)

Die tweede waarheid was dat die gelowiges die woord van die Here geleer was.

Omdat sommige mense nie in die stad na Paulus wou luister nie het hy die gelowiges eenkant geneem en in die Here se woord onderrig. Ons lees dat hierdie lering vir twee jaar plaasgevind het, en dat die hele Asië beïnvloed was met die Here se woord.

Ek haal aan: “Maar toe sommige hulle verhard en ongehoorsaam was en voor die menigte aanhou kwaadsprek van die Weg, het hy van hulle weggegaan en die dissipels afsonderlik geneem en elke dag in die skool van ‘n sekere Tirànnus samesprekinge gehou. En dit het twee jaar lank geduur, sodat al die inwoners van Asië die woord van Here Jesus gehoor het, Jode sowel as Grieke.” (Hand. 19:9,10)

Deur die jare heen het ek uitgevind dat die prediking op Sondag nie genoeg woord is vir ons lidmate nie. As gemeentes ware groei wil sien sal hulle bo en behalwe Sondag se prediking hul mense toerus in God se ewige woord. Enige spesiale poging hierin sal beloon word met geestelike groei.

Die derde ding wat God gebruik het tot groei in Efese was:

Wonders en tekens

Verse 11,12: “En God het buitengewone kragte deur die hande van Paulus gedoen, sodat selfs wanneer doeke of voorskote wat aan sy lyf was, op die siekes gelê is, die siektes van hulle gewyk en die bese geeste van hulle uitgegaan het.”

Wonders en tekens sal gemeentes laat groei. Daarom moet jy en ek die Here daarvoor vertrou.

Jesus het mos aan ons as gelowiges die volgende belof: “Voorwaar, voorwaar Ek sê vir julle, wie in My glo – die werke wat Ek doen, sal hy ook doen; en hy sal groter werke doen as dit, omdat Ek na my Vader gaan.” (Joh. 14:12)

Die vierde ding wat God gebruik het om groei in Efese te bewerkstelling is toe almal wat christene geword het hulle sonde bekend gemaak en bely het.

Bedekte sonde sal altyd geestelike groei verhinder.

Maar wanneer sonde bely en laat staan word sal daar verseker groei plaasvind.

Ons lees in verse 18 en 19: “En baie van die wat gelowig geword het, het belydenis kom doen en hulle dade bekend gemaak; en verskeie van die wat met towery omgegaan het, het die boeke bymekaargebring en voor almal verbrand; en hulle het die waarde daarvan bereken en gevind dat dit vyftifduisend silwerstukke was.” **Vers 20:** “**So het die woord van die Here met krag gegroei en sterk geword.**”

Die Nuwe vertaling stel dit as volg: “So het die woord van die Here sy krag getoon en al hoe verder versprei.”

Die Boodskap gebruik hierdie woorde: “Die Woord van die Here het in Efese van krag tot krag gegaan. Al hoe meer mense het geglo.”

As gelowiges moet ons altyd onthou dat **1 Joh. 1:7-9** eintlik geskryf is vir ons as gelowiges. As ons dus bereid is om “in die lig te wandel” (m.a.w. die goeie na te streef) en “gemeenskap met mekaar” te hê (m.a.w. in goeie verhouding met my mede-gelowige te leef) **dan sal die bloed van Jesus ons reinig van alle sonde**. As ons dus nie bereid is om bogenoemde te doen nie sal die bloed van Jesus ons nie kan reinig van ons sondes nie.

Wees altyd bereid om jou sonde te bely ! (vers 9)

WAAROM ONS (AS GEMEENTE) **GOD SE KONINKRYK MOET VERSTAAN ?**

Ons sal ware groei sien in onself asook in God se Kerk indien ons die beginsels van Sy Koninkryk sal verstaan en toepas.

Ons probleem vandag is dat baie gemeentes se "koninkryk visie" gaan net om hulle kerkgebou en hulle gemeente.

DIE KONINKRYK VAN GOD WAS DIE PREDIKING VAN DIE NUWE TESTAMENT

Jesus se hele prediking het gegaan oor die Koninkryk van God

Matt. 4: 17,23: "Van toe af het Jesus begin om te preek en te sê: **Bekeer julle, want die koninkryk van die hemele het naby gekom.** En Jesus het deur die hele Galilea rondgegaan en in hulle sinagoges geleer en die Evangelie van die Koninkryk verkondig **en elke siekte en elke kwaal onder die volk genees**".

Dit is duidelik dat 'n mens nie kan inkom in God se Koninkryk sonder bekering nie. Verder is dit ook duidelik uit wat hier in Matt. 4 gebeur het dat waar God se koninkryk kom vind daar genesing en wonders plaas.

By die vermeerdering van die brode lees ons dié besondere woorde in **Luk. 9:11:** "En Hy het hulle ontvang en met hulle gesprek oor die koninkryk van God".

Selfs in die "**Onse Vader**" leer Hy ons bid: "laat u koninkryk kom;" (**Mat. 6:10**). **Lees ook:** Matt. 5:10, Matt. 10:7,8.

In **Matt. 6:33;** sê Jesus dat ons Sy koninkryk moet soek! "**Maar soek eers die koninkryk van God en sy geregtigheid, en al hierdie dinge sal vir julle bygevoeg word**". ("Hierdie dinge" verwys na wat ons eet, drink en aantrek).

HIER STAAN NIE:

1. "Sodat al hierdie dinge vir julle bygevoeg kan word nie"?
2. **OOK NIE:** "Met dié motief om al hierdie dinge te kry nie"?

MOENIE KYK WAT JY UIT GODSDIENS KAN KRY NIE, MAAR KYK WAT JY DAARIN KAN INSIT!!

AMPLIFIED BIBLE: "But seek for (aim at and strive after) first of all His kingdom, and His righteousness (His way of doing and being right) and then all these things taken together will be given you besides".

DIE LEWENDE BYBEL: "Waarop julle in die eerste plek moet konsentreer, is dat God se koninkryk erken sal word en dat mense sal doen wat Hy wil hê, dan sal Hy vir julle boonop al hierdie dinge gee wat julle nodig het."

KRY JOU PRIORITEITE REG!!

God is vòòr my man òf vrou; voor my werk; my studies; my familie en vriende; my plesier en my eie behoeftes.

WAT BEDOEL ONS AS ONS PRAAT VAN DIE KONINKRYK VAN GOD?

Die Griekse woord vir "Koninkryk" is **Basileia**. Dit beteken:"KONINKLIKE GEBIED"

God se koninkryk is die **gebied** en **plek** waar God se wil erken en gehoorsaam word.

- **IN MY HART** - Daarom moet jy jou hart bewaak.
Mark. 7:21-23 "Want van binne, uit die hart van die mense, kom die slegte gedagtes, egbreuk, hoerery, moord, diewery, hebsug, boosheid, bedrog, losbandigheid, afguns, lastering, hoogmoed, dwaasheid. Al hierdie booshede kom van binne uit en maak die mens onrein."

In Lukas 17:20,21; vertel Jesus dat ons die koninkryk van God geestelik moet verstaan: "En toe Hy deur die Fariseërs gevra is wanneer die koninkryk van God sal kom, het Hy hulle geantwoord en gesê: Die koninkryk van God kom nie met sigbare tekens nie. En hulle sal nie sê: Kyk hier! of kyk daar! nie; want die koninkryk van God is binne-in julle".

DIT IS AS GOD REGEER IN MY HART. IS DIT OOK JOU GETUIENIS?

- **IN MY HUIS** - Wat laat jy toe in jou huis?
- **IN MY BESIGHEID OF WERK** - Daarom moet jy eerlike besigheid doen.

KOM ONS BAKEN DIE GEBIED AF VIR GOD WAAR ONS WOON, WERK OF STUDEER.

Charles Finney, daardie magtige evangelis, het sy dorp sò af gebaken vir God! Selfs wanneer treine in die nag deur sy dorp beweeg het, het mense neergeval en hul aan God oorgegee. Kom ons neem ons gemeenskap in besit vir God.

JESUS SE EIE DISSIPELS HET GEDINK DAT SY KONIKRYK SOU BEVESTIG WORD AS HY HUL VERLOS HET VAN DIE ROMEINSE JUK.

KYK NA HUL VRAAG EN SY ANTWOORD:

Hand. 1:6-8: "Die wat bymekaargekom het, vra Hom toe en sê: Here, gaan U in hierdie tyd die koninkryk vir Israel weer oprig? En Hy antwoord hulle: Dit kom julle nie toe om die tye of geleenthede te weet wat die Vader deur sy eie mag bepaal het nie; maar julle sal krag ontvang wanneer die Heilige Gees oor julle kom, en julle sal my getuienis wees..."

VIR PILATUS HET JESUS GESÊ:

Joh. 18:36: " My koninkryk is nie van hierdie wêreld nie, as my koninkryk van hierdie wêreld was, sou my dienaars geveg het, dat ek nie aan die Jode oorgelewer word nie. Maar nou is my koninkryk nie van hier nie."

1 Kor. 4:20: is 'n besondere woord waar Paulus sê:

"Want die koninkryk van God bestaan nie in woorde nie, maar in **krag**"

'n Voorbeeld hiervan vind ons waar Jesus 'n blinde en stomme gees uit 'n man uitgedyf het.

Die Fariseërs het Jesus beskuldig dat Hy dit gedoen het deur die krag van die owerste van die duiwels.

Jesus antwoord hulle in Matt. 12:28: "Maar, as Ek deur die Gees van God die duiwels uitdryf, dan het die koninkryk van God by julle gekom".

MAG GOD SY KONINKRYK BEVESTIG DEUR DIE KRAG VAN DIE HEILIGE GEES!

Uit **Matt. 12** lei ons af dat elke keer as God werk deur Sy Heilige Gees, dan het Sy koninkryk daar gekom.

ONS ERVAAR DIT BY ELKE:

1. Bekering
2. Vervulling met die Heilige Gees
3. Genesing
4. Bevryding

DIE KONINKRYK VAN GOD BREEK ALTYD VIR HOMSELF 'N PAD OOP!

In Matt. 11 vers 12 sê Jesus: "Maar van die dae van Johannes die Doper af tot nou toe word die koninkryk van die hemele bestorm, en bestormers gryp dit met geweld".

DIE NUWE VERTALING STEL DIT Sò TREFFEND:

"Sedert die dae van Johannes die doper tot nou toe breek die koninkryk van die hemel vir homself 'n pad oop, en mense wat hulle kragte inspan, kry dit in besit".

DIE LEWENDE BYBEL Sê WEER;

"Vandat Johannes die doper begin preek het tot vandag toe is die nuwe ryk waarin God regeer besig om deur elke weerstand te breek, en mense wat al hulle kragte daarop konsentreer maak dit hulle eie".

KING JAMES VERTALING:

"And from the days of John the baptist until now the kingdom of heaven suffereth violence, and the violent take it by force".

HOE HET DIE KONINKRYK VAN GOD SEDERT JOHANNES DIE DOPER VIR HOMSELF 'N PAD OOPGEBREEK?

Matt. 3:1-12 Johannes preek en sê: "Bekeer julle, want die koninkryk van die hemele het naby gekom". Bekering is beslis nodig as 'n mens die koninkryk van God wil ingaan. Bekering is iets wat met "geweld" plaasvind want dit is 'n 180 grade omdraai in 'n mens se lewe.

Die mense bestorm Johannes die dooper uit Judea en omgewing om gedoop te word. Hy het hul gedoop terwyl hul sondes bely het. (v.5,6)
Ja, waarlik, die koninkryk van God het vir homself 'n pad deurbreek in hierdie mense se harte.

KYK WAT HET GEBEUR TOE JESUS DIE BOODSKAP VAN DIE KONINKRYK BEGIN VERKONDIG.

Matt. 4:17,23,24 *"Van toe af het Jesus begin preek en te sê: Bekeer julle, want die koninkryk van die hemele het naby gekom.....En Jesus het deur die hele Galilea rondgegaan en in hulle sinagoges geleer en die evangelie van die koninkryk verkondig en elke siekte en elke kwaal onder die volk genees. En die gerug aangaande Hom is versprei oor die hele Sirië; en hulle het na Hom gebring almal wat ongesteld was, wat gekwel was deur allerhande siektes en pyne en wat van duiwels besete was, en maansiekes en verlamdes; en Hy het hulle gesond gemaak."*

Wonders vind altyd plaas waar die koninkryk vir homself 'n pad deurbreek. Selfs duiwels moet dan padgee.

Matt. 8:1-3 *"En toe Hy van die berg afkom, het groot menigtes Hom gevolg; en daar het 'n melaatse man gekom en voor Hom neergeval en gesê: Here, as U wil, kan U my reinig. Daarop steek Jesus die hand uit en raak hom aan en sê: Ek wil; word gereinig! En dadelik is hy van sy melaatsheid gereinig."*

Dié melaatse het sy kragte ingespan en dit gewaag om naby Jesus neer te val. Melaatses moes vêr weg van ander gebly het, anders was hul gestenig. Melaatsheid word in die Bybel vergelyk met sonde. As 'n mens in sonde verval het, kos dit voorwaar inspanning om na God te gaan vir reiniging.

In Matt. 8 verse 28 tot 34 vind ons die verhaal van die besetenes van Gadara. God se koninkryk tref die gebied met geweld. 2000 varke (wat onreinheid voorstel) bly in die slag! Dit is altyd sò: As God se koninkryk in 'n hart of huis inkom moet alle onreinheid pad gee.

In Matt. 9:1-8 lees ons van die verlamde man in Kapernaüm.

Dit is voorwaar geweld om 'n ander man se huis se dak oop te breek. Maar sy vriende was so desperaat dat toe hulle nie hul lam vriend by die deur kon inkry nie, het hulle die huis se dak oopgebreek en die lam man voor Jesus laat neersak, sodat hy gesond kon word.

Wat doen jy en ek om mense by Jesus uit te kry? Sal ons bereid wees om hierdie soort geweld te gebruik? As dit gaan oor God se koninkryk sal ons regtig ons kragte moet inspan om dit in besit te neem vir onself asook vir ander wat in nood is.

Nog 'n voorbeeld van hoe die Koninkryk van God vir homself 'n pad deurgebreek het vind ons in Matt. 9:18 tot 22.

Dit is waar Jesus die vrou genees het wat aan bloedvloeiing gely het.

Sy dring met geweld deur die skare. Sy is maar 'n vrou en baie siek weens die baie bloed wat sy die afgelope twaalf jaar verloor het. Haar tipe siekte maak haar eintlik onrein en in werklikheid mag sy nie in die publiek verskyn nie.

Sy kon selfs, volgens die wet, gestenig gewees het maar sy is vasberade en span àl haar kragte in om by Jesus uit te kom. Sy raak van agter af Sy kleed aan en ontvang onmiddelik haar genesing.

Gelukkig draai Jesus om na haar en sê: *“Hou goeie moed, dogter, jou geloof het jou gered. En die vrou het gesond geword van daardie uur af.”* (Matt. 9:22)

Is jy siek? Is jy in nood? As jy iets van God wil hê sal jy al jou kragte moet inspan om by Jesus uit te kom. Geen mens mag jou verhinder om dit te doen nie.

Kom ons glo dat die koninkryk van God ons dorp of stad sal besoek soos wat met Efese in Hand. 19 gebeur het. Dit was 'n stad vol afgodsbeelde en towerkunste. Maar kyk wat gebeur toe God se koninkryk deurbreek.

Hand. 19:18-20 *“En baie van die wat gelowig geword het, het belydenis kom doen en hulle dade bekend gemaak; en verskeie van die wat met towery omgegaan het, het die boeke bymekaargebring en voor almal verbrand; en hulle het die waarde daarvan bereken en gevind dat dit vyftigduisend silwerstukke was. So het die woord van die Here met krag gegroei en sterk geword.”*

O! VIR GEWELD IN ONS GEES:

- Om gered te word.
As jy verlos wil word van iets, bely dit en laat dit ook staan met 'n wilsbesluit.
- Om genesing te verkry.
Neem jou stand teen die siekte deur skrifte van genesing te bely. Skryf die skrifte neer, plak dit teen jou spieël of yskas en bely dit daagliks.
Maak soos Mia Venter, die skilder, gemaak het. Toe die spesialis haar drie weke gegee het om te leef weens kanker, het sy haarself ontslaan uit die hospital en vir 21 dae gaan vas en bid. Sy het vir my vertel dat sy die kankerselle gaan “dood vas”
Daarna is sy terug na die spesialis wat verbaas was om haar lewendig te sien. Na baie toetse kon hy niks verkeerds vind nie. Haar woorde aan hom was: *“Dokter jy het my doodvonnis uitgespreek met jou mond. Ek wil jou nou vra om dit duidelik uit te spreek dat ek volmaak gesond is.”*
Hy het dit gedoen, en sy het daar weggestap as 'n gesonde mens. Dit is geweld in 'n mens se gees !
- Teen die duiwel wat ons huise en huwelike aanval.
Vir die vroue wil ek sê: *“Veg vir jou huwelik! Maak jou ekstra mooier en maak ekstra beter maaltye en “verlei” jou man.....om hom terug te wen vir jouself en vir God. Jy het 'n wettige huwelikslisensie en die ander dame is nie wettig getroud met jou man nie. Jy het dus voordele bo haar.”*

- Indien jy 'n geestelike deurbraak in jou lewe begeer sal daar geweld en deursettingsvermoë in jou gees moet kom. Besluit nou of nooit moet ek God soek met my hele hart. Lees jou Bybel meer en bid meer.

WAT IS DIE WOORWAARDES VAN TOELATING TOT DIE KONINKRYK VAN GOD?

Joh. 3:3 *“Jesus antwoord en sê vir hom (Nikodemis) Voorwaar, voorwaar Ek sê vir jou, as iemand nie weer gebore word nie, kan hy die koninkryk van God nie sien nie.”*

Wedergeboorte is wanneer ons ons sondes bely en Christus aanneem as ons verlosser. Dit is dan dat God se Gees 'n geestelike geboorte in ons laat plaasvind sodat ons God se kind mag wees.

EN WAT SAL ONS OPTREDE WEES NADAT ONS DEEL GEWORD HET VAN GOD SE KONINKRYK?

Ons sal die koninkryks beginsels nakom wat ons vind in Matt. 5, 6 en 7. Dié deel word die “Bergpredikasie van Jesus” genoem. (In Engels is dit “Be-attitudes” M.a.w. “Attitudes-to-be”)

In Matt. 5 leer ons:

- Ons sal sagmoediges wees (v. 5)
- Ons sal 'n honger en dors hê na geregtigheid (die dinge wat God behaag) (v. 6)
- Ons sal barmhartigheid kan gee (v. 7)
Iemand het dit in Engels so uitgedruk: *“Do you know why I give grace? Because I need grace.”*
- Ons sal beslis rein van hart wees (v. 8)
- Ons sal vrede kan maak omdat ons vrede het (v. 9)

Die res van Matthëus 5,6 en 7 moet jy met aandag gaan lees.

Volgens Jesus se woorde in **Matt. 25:34-36** sal ons:

- Die wat honger het voed
- Die wat dors het iets te drinke gee
- Die siekes besoek
- Die gevangenis bedien

DIE SLEUTELS VAN DIE KONINKRYK

In **Matt. 16:19** sê Jesus vir Petrus: *“En Ek sal jou die sleutels van die koninkryk Van die hemele gee; en wat jy ook op die aarde mag bind, sal in die hemel gebonde wees, en wat jy ook op die aarde mag ontbind, sal in die hemel ontbonde wees.”*

Die koninkryk van God en die koninkryk van die Hemele is presies dieselfde. Die rede waarom Mattheüs nie praat van die koninkryk van God nie, maar wel van die koninkryk van die hemele is omdat die Jode die naam van God nie geskryf of gesê het nie, omdat hul bang was dat hul dit ydellik sou doen. Ex. 20:7; "Jy mag die Naam van die Here jou God nie ydellik gebruik nie, want die Here sal die een wat Sy naam ydellik gebruik nie ongestraf laat bly nie".

‘n Kort samevatting oor die Koninkryk:

In **Matt. 5 tot 7** leer Jesus ons die beginsels van die koninkryk.

In **Matt. 8 en 9** vind 10 wonders plaas om die koninkryk van God te bevestig.

In **Matt. 10** stuur Jesus Sy dissipels uit om Sy koninkryk te gaan uitbou. Hy gee Sy dissipels gesag in Sy koninkryk.

In **Matt. 16:19** leer Jesus ons dat hierdie koninkryk sleutels het.

- Elke huis en besigheid het sy eie sleutels.
- Enige persoon het nie toegang tot jou huis nie; maar net hulle wat daar woon.
- Sal jy belangrike sleutels aan enige persoon of kind gee?
Motorsleutels?
Voordeursleutels?
Kombuiskaste?
Kluisleutels?

VRAAG: Kan God jou vertrou met Sy sleutels?

KAN ONS NAME GEE AAN DIE SLEUTELS VAN DIE KONINKRYK ?

1. Die eerste sleutel vind ons in Matt. 18:1-3;
NEDERIGHEID - As u groot wil wees, word soos ‘n kind.
2. Matt. 12:22-25:
EENHEID - As 'n koninkryk teen homself verdeeld is kan dit nie bly staan nie. As ons VERDEELD is sal ons nie geestelike deure oopkry nie.
3. In **Rom. 14:17**: Gee Paulus 3 sleutels in een bos.
"Want die koninkryk van God is nie spys en drank nie, maar GERECHTIGHEID en VREDE en BLYDSKAP in die Heilige Gees"

AMPLIFIED BIBLE: "After all the kingdom of God is not a matter of food and drink but instead, it is righteousness - that state which makes a person acceptable to God - and heart peace and joy in the Holy Spirit".

GEREGTIGHEID

(Righteousness - In right standing with God)

'n Toestand waar ek aanneemlik voor God is! - Sonder enige skuld.

Net 'n offer van bloed is aanneemlik voor God. Dink aan die bloed-offer wat die hoëpriester moes bring op die versoendag.

Die wet binne die verbondsark was nie genoeg nie - God wou die bloed sien

KAN GOD DIE BLOED VAN JESUS SIEN IN JOU LEWE?

Volgens **Rom. 4:3-5** kry ons geregtigheid nie deur verdienste nie, maar deur geloof in God.

Hiskia het 15 jaar langer geleef omdat hy die sleutel van geregtigheid in sy hand gehad het op sy sterfbed. (2 Kon. 20)

Hy kon vir God daarop wys dat hy in opregtheid voor Hom geleef het.

VREDE

- Spanning bind jou - maar vrede maak vry.
- Elke huwelik het voorwaar dié sleutel nodig.
- As jy vrede met God het, asook met jou medemens - dán het jy God se koninkryk binne in jou.

BLYDSKAP IN DIE HEILIGE GEES

Hierdie blydskap kan nie deur vervolging gesteel word nie.

Nadat die Apostels geslaan was, lees ons in Hand. 5:41; "Hulle het toe van die raad af weggegaan, bly dat hulle waardig geag was om vir Sy naam oneer te ly".

Dink ook aan Hand. 16. Waar Paulus en Silas selfs traliedeure oopgesing het! Jy kan dieselfde ondervind as jy hierdie sleutel van God se Koninkryk in jou lewe gebruik. Geen wonder dat Nehemia onder baie druk van sy vyande kon uitroep: Neh. 8:11: "Die blydskap in die Here - dit is julle beskutting".

Hierdie blydskap word nie eers beïnvloed deur 'n misoes of ander skade nie. Die profeet Habakuk roep uit in Hab. 3:17,18 *"Alhoewel die vyeboom nie sal bloei en aan die wingerdstokke geen vrug sal wees nie, die drag van die vyeboom sal teleurstel en die saailande geen voedsel oplewer nie, die kleinvee uit die kraal verdwyn en geen beeste in die stalle sal wees nie – nogtans sal ek jubel in die Here, ek sal juig in die God van my heil."*

BESIT JY: Geregtigheid? Vrede? Blydskap in die Heilige Gees?
Dan besit jy God se koninkryk.

KONINKRYKSWETTE

In Matt.5,6,7 vind ons die wette (of beginsels) van die koninkryk.

Elke koninkryk het wette wat streng nagekom moet word. God se koninkryk het ook duidelike wette. Jakobus verwys na een van hierdie koninkrykwette in Jak.2:8. "As julle ewenal die **koninklike wet** volbring volgens die skrif: Jy moet jou naaste liefhê soos jousef - dan doen julle goed".

ONS VIND DIE VOLGENDE KONINKRYKSWETTE:

Die koninkryk's wet oor: **VERSOENING.** (Matt. 5:21-26)

Die nuwe vertaling: vers 22 - 24: "Maar ek sê vir julle : Elkeen wat vir sy broer kwaad is, is al strafbaar voor die regsbank. Verder, elkeen wat sy broer uitskel vir 'n gek, is strafbaar voor die Joodse Raad: en wie hom uitskel vir 'n idioot, is strafbaar met die helse vuur. As jy dus jou gawe na die altaar toe bring en dit jou daar byval dat jou broer iets teen jou het, laat staan jou gawe daar by die altaar en gaan maak eers vrede met jou broer en kom dan en bring jou gawe".

'N PAAR VRAE OOR VERSOENING:

Wat beteken die woord "Versoening"? Dit meen om vrede te maak. Ons moet ten eerste vrede maak met God, en waar nodig met ons medemens en moenie vergeet om met jousef ook vrede te maak nie.

As God jou vergeef het, vergewe dus ook jousef.

Wanneer moet ek met my broer (of suster) versoen? Matt. 5:23, 24: sê as ek besig is om tot God te bid of te aanbid en dit sou my byval dat my broer/suster iets teen my het, dan moet ek eers met hulle gaan regmaak voordat ek voortgaan om te bid of aanbid.

Hoe versoen ek met my broer? Matt. 18:15 - 17

Hoeveel keer moet ek kan vrede maak? Matt.18:21,22; Luk. 17:3,4.

Ja, tot sewe maal per dag en soveel as 490 keer.

Hoekom moet ek vrede maak? As ek dit nie doen nie sal God my oorgee aan die "pynigers" - Matt. 18:34,35.

Ek moet kan vrede maak met ander as ek wil hê daar moet vrede tussen my en God wees - Luk.11:4. Baie kan nie hul berge van probleme verskuif nie, omdat hul nie kan vergewe nie - Mark. 11:22-26.

Die HUWELIKSWET (Matt. 5:27 – 32)

Wat is die huwelik? Dit is 'n verbintenis tussen een man en een vrou, wat 'n gelofte voor God gemaak het, om aan mekaar verbind te bly totdat die dood hul sou skei! God het in elke geval vir Adam net een vrou gemaak!

Die huwelik is 'n instelling van God en is 'n heilige saak. 1 Tim. 4:1-3, Heb.13:4

Daar is pligte in die huwelik. Ef.5:22-23, 1 Pet.3:1-7.

Die wet oor **EEDSWERING** (Matt. 5:33-37)

Dit beteken: 'n Getuienis voor God aflê dat 'n verklaring die waarheid is.

Voorbeelde in die Ou Testament:

Gen. 21:23-32: Abraham en Abiméleg

Gen. 24:2-4: Abraham en Eliëser

Gen. 47:29-31: Jacob en Josef

God verlang van ons dat ons woord ons eer moet wees.

Jesus sê in Matt. 5:37: "Maar laat julle woord wees. Ja Ja, nee nee. Wat meer as dit is, is uit die bouse".

Luister wat sê Jakobus in die Lewende Bybel: Jak. 5:12 : "Liewe broers, daar is nog iets wat baie belangrig is. Julle moet liever glad nie sweer as julle wil wys dat julle die waarheid praat nie".

Die wet oor **VERGELDING** (Matt. 5:38-48)

Dit beteken: Afrekening of Terugbetaling.

Die wet oor **GESINDHEDE** (Matt. 6:2,5,16)

In Filippense leer Paulus die volgende oor gesindhede: **Fil. 1:12-18**.

Kyk wat was Paulus se gesindhede teenoor hulle wat die evangelie verkondig nie met suiwer bedoelinge nie.

Paulus het probleme met ander se gesindhede en motiewe - maar kyk hoe besonders is syne wanneer hy uitroep in vers 18: "Maar wat maak dit? In alle geval, op allerlei wyse, of dit onder 'n skyn of in waarheid is, word Christus verkondig; en hierin verbly ek my en sal ek my ook verbly".

Paulus verwys ook dan na die wonderlike gesindhede wat in Jesus was en moedig ons aan om dié gesindhede te bekom. Fil. 2:1-5

Hierdie gesindhede is om:

- nie selfsugtig te wees nie
- nie eie eer te soek nie
- nederig te wees
- ander hoër te ag as jouself
- na ander se belange ook om te sien

Die wet oor **KWELLING** (Matt. 6:25-34)Die wet oor **GEE** (Lukas 6:36-38)

Dit is tog saliger om te gee as om te ontvang. Hand. 20:35:

Die dooie see is "dood" omdat dit net water ontvang, en geen uitloop het nie.

Wanneer ons aan God gee is die volgende beginsels van toepassing:

1. Gee gewilliglik - Ex.25:2, 1 Kron. 29:9
2. Gee blymoedig - 2 Kor. 9:7
3. Gee ooreenkomstig God se seën aan jou. Deut.16:17
4. Gee jou beste. Mal. 1:8, 13, 14
(kyk wat was die klag teen Israel)

Die wet oor **oordeel** (Matt. 7 : 1-5)

Kom ons kyk na die betekenis van die volgende woorde:

oordeel Uitspraak; Mening; Opinie; Sienswyse.

beoordeel: Goekeuring of afkeuring uitspreek: Om waarde te bepaal:
Opbouend te kritiseer

veroordeel: Oordeel vooruit sonder die vereiste kennis en bewyse
Moenie oordeel nie - al dink jy dat jy al die feite het.

DIE BYBEL BELET ONS OM TE OORDEEL. Rom. 2:1-3 Jak. 4:11,12

Wanneer 'n gemeente die beginsels van God se koninkryk verstaan, sal daar geestelike groei plaasvind.

DIE BELANGRIKHEID VAN “BEDIENINGE”

IN GEMEENTE GROEI

‘n Gemeente sal voorwaar groei deur Bedieninge

In 1 Kor. 12: lees ons die volgende:

Vers 1: *“En wat die geestelike gawes betref, broeders, wil ek nie hê dat julle onkundig moet wees nie.”*

Verse 4-6: *“Daar is wel verskeidenheid van **genadegawes**, maar dit is dieselfde Gees; en daar is verskeidenheid van **bedieninge**, en tog is dit dieselfde Here; en daar is verskeidenheid van **werkinge**, en tog is dit dieselfde God wat alles in almal werk.”*

Verse 27,28: *“Maar julle is die liggaam van Christus en lede afsonderlik. En God het sommige in die gemeente gestel: in die eerste plek apostels, ten tweede profete, ten derde leraars, daarna kragte, daarna genadegawes van gesondmaking, helpers, regeringe, allerhande tale.”*

- Reg deur die wêreld is God besig om bedieninge in Sy Kerk te herstel. God wil vandag die lidmaat gebruik meer as ooit tevore.
- Baie lidmate weet ongelukkig nie wat hul bediening of funksie is in hul plaaslike gemeente waar hul aanbid nie.
- Vandag is daar ongelukkig baie onkunde rakende die gawes en bedieninge

As ek jou vra wat is jou **Bediening** of **Werk** of wat is jou **Genadegawe** wat God vir jou gegee het, dan het ek eintlik dieselfde vir jou gevra.

Byvoorbeeld: As jou “bediening” is om vir siekes te bid kon ek ook jou vra watter “werk” geniet jy om vir God te doen? Jou antwoord sou dan wees om vir siekes te bid. Dan is jou “bediening” of “genadegawe” wat God jou gegee het, naamlik om vir siekes te bid.

- Om in die regte bediening te staan gee aan ‘n mens wonderlike vervulling Paulus skryf aan Timotheus en gee hom raad wat hy alles as herder in die gemeente moet doen maar stel dit duidelik dat ‘n mens net werklik vervulling kry in jou bediening waarin die Here jou geroep het, en daarom moedig hy hom aan met die volgende woorde:
*“verkondig die woord; hou aan tydig en ontydig; weerlê, bestraf, vermaan in alle lankmoedigheid en lering. Maar wees jy in alles nugter; ly verdrukking; doen die werk van ‘n evangelis; **vervul jou bediening.**” (2 Tim. 4:2,5)*

Hieroor skryf Paulus ook aan Archippus.

*“En sê aan Archippus: Gee ag op die bediening wat jy ontvang het in die Here, **dat jy dit vervul**” (Kol. 4:17)*

Die Kerk is vol “onvervulde” Christene

Dieselfde vind ons in die daaglikse lewe

***‘n Bankbestuurder wou eintlik ‘n boer gewees het wat koeie melk
‘n Onderwyser wou eintlik ‘n motorwerktuigkundige gewees het***

Soos wat baie mense daaglik na hul werk gaan en frustreerd is omdat hulle die verkeerde werk doen; net so is gelowiges frustreerd in die kerk omdat hulle besig is met dinge waarvoor God hul nie geroep het nie.

Dit mag wees dat die gemeente hulle gekies het om 'n sekere bediening te vervul of dat die gemeente leiers hul daarin aangestel het. Maar die vraag is: *“Het die Heilige Gees hulle afgesonder vir die taak soos wat gebeur het in die gemeente van Antiochië met Barnabas en Paulus ?” (Hand. 13:3,4)*

Indien ons 'n studie maak van Efesiërs 4:11-16 dan is daar DRIE vrae om te vra:

- **Waarom het God die “vyfvoudige bediening” gegee vir Sy kerk ?**
God het die “vyfvoudige bediening” gegee soos: apostel; profeet; evangelis; herder en leraar om die lidmate toe te rus vir hulle werk wat hulle vir Hom moet doen. (Ons lees dit in **Ef. 4:11,12**)
- **Wat moet my bediening doen vir myself ?**
Deur die bediening wat die Here jou en my gegee het wil Hy ons laat geestelik groei. **Ef. 4:13-15**
Vers 13: “totdat ons almal kom tot die eenheid van die geloof en van die kennis van die Seun van God, tot 'n volwasse man, tot die mate van die volle grootte van Christus.”
My “bediening” moet my dus help om Jesus beter te leer te leer ken en te groei na geestelike volwassenheid. Paulus noem dit hier: *“tot die mate van die volle grootte van Christus.”*
Indien bogenoemde nie gebeur nie, moet ek seker maak of ek in die regte bediening staan.
Bv. Indien ek deel is van die aanbiddingspan in my kerk en ek groei nie geestelik nie, mag dit wees dat dit nie die regte bediening vir my is nie. (Ja, daar mag ook ander redes wees indien ek nie groei nie)
- **Wat moet bediening doen vir die gemeente ?**
Een van die hoofredes vir bediening is dat daar in 'n gemeente **eenheid, liefde** asook **groei** sal wees volgens **Ef. 4:16**

Persoonlike getuienis

Ons het ervaar hoe 'n gemeente kan groei indien die lidmate verstaan hoe God Sy liggaam (die gemeente) saamgevoeg het en toe elkeen hul bediening ontdek het.

Dit was in ons gemeente in Bloemfontein in 1982.

Toe ons daar gekom het was daar net 293 lidmate (dan tel jy ook hulle wat lanklaas in die kerk was)

Vir vyf Sondae het ek leering gegee uit veral 1 Kor. 12 en hoe elkeen sy/haar bediening moes ontdek. In 'n kort tyd het die gemeente gegroei na een die grootste gemeentes in die land.

Wat natuurlik vir my 'n uitdaging was, was toe my vrou my kom vra het of dit wat ek leer net vir die lidmate was of ook vir haar ? Want baie van die dinge wat sy moes doen in die gemeente wou sy nie doen nie, omdat dit nie was wat God haar voor geroep het nie. Sy wou vroue die woord leer en dan wou sy my "worship leader" wees. In daardie tyd het vroue net nie die gemeente in aanbidding gelei nie. Dit was 'n uitdaging, maar gelukkig was my leiers saam met ons en het sy uiteindelik hierdie take met groot sukses vervul.

Ek onthou hoe ek 'n "Bedieningsvorm" aan elke lidmaat gegee het aan die einde van die vyf Sondae na my prediking oor bediening. Elkeen moes tenminste by een bediening 'n kruisie maak, indien hulle ervaar het dat God hul daarin wou gebruik.

Daarna het ek die groepe bymekaar gekry en deeglike opleiding gegee, sodat elkeen effektief kon wees in hul bediening.

In een jaar het die gemeente met 400 lidmate gegroei en was ons 750.

Lei jou mense op en gebruik hulle. Skep geleentheid ook aan die einde van die dienste dat hulle vir mekaar kan bid en bedien. Vertrou jou mense en laat toe vir foute !

Daardie tyd in Bloemfontein het ek o.a. 24 mense toegerus om vir siekes te bid, veral in hospitale. Een vrou, Rika, was uitstaande. Daar was tye dat geneeshere nie predikante gevra het om vir sterwende mense te bid nie, maar vir haar. God het haar besonders gebruik en baie genesings het plaasgevind.

Regoor die wêreld sien ons dat gemeentes wat werklik groei is gemeentes wat hul lidmate help om in hul regte bediening te kom en hulle dan gebruik.

WIL JY SIEN DAT DAAR GROEI, EENHEID EN LIEFDE IS IN JOU GEMEENTE? Verstaan dan wat God ons wil leer in Efesiërs 4:16.

Hierdie skrif is so belangrik dat ek dit goed gedink het om die volgende vertalings met jou te deel:

Ou Vertaling: "Uit wie die hele liggaam - goed saamgevoeg en saam verbind deur die ondersteuning wat elke lid gee volgens die werking van elke afsonderlike deel in sy mate - die groei van die liggaam bevorder vir sy eie opbouing in liefde"

Volgens hierdie skrif word die "liggaam" naamlik "die gemeente" aanmekaar verbind deur die ondersteuning van die lidmate, wanneer elkeen hul funksie vervul waarvoor die Here hulle geroep het.

Dit is dus duidelik dat bediening "groei" asook "eenheid" en "liefde" bewerk In die gemeente.

Ander vertalings van Ef. 4:16 lees soos volg:

Nuwe Vertaling: "Die verskillende liggaamsdele pas bymekaar en vorm saam 'n eenheid. Elkeen van hulle vervul sy funksie, en so bou die liggaam homself op in liefde"

Die Lewende Bybel: “Die kerk is Sy liggaam en die hele liggaam is van Hom afhanklik. Die dele van die liggaam is aan mekaar verbind en vorm ‘n eenheid omdat elke liggaamsdeel sy werk doen en die ander liggaamsdele help. So groei die liggaam deur die medewerker van al die liggaamsdele, en daar is liefde onder mekaar.”

The Living Bible: “Under His direction the whole body is fitted together perfectly, and each part in its own special way helps the other parts so that the whole body is healthy and growing and full of love.”

Amplified Bible: “For because of Him the whole body (the church, in all its various parts closely) joined and firmly knit together by the joints and ligaments with which it is supplied, when each part (with power adapted to its need) is working properly (in all its functions), grows to full maturity, building itself up in love”.

In al bogenoemde tekse is dit duidelik dat indien ons eenheid, groei en liefde in ons gemeente wil sien, sal elkeen sy deel moet bydra waarvoor die Here hom of haar geroep het om te doen.

ALGEMENE OPMERKINGS OOR BEDIENINGE

- Indien iemand frustreerd is in dit wat hul vir die Here doen - dan is dit nie hul bediening nie. Want die regte bediening bring vervulling
- Sou ‘n persoon nie meer sukses in sy/haar bediening hê nie, het so ‘n persoon hul salwing verloor. Want salwing bevestig ‘n mens se bediening. Ex. 40:15
- Dit kan ook wees dat jy ‘n nuwe bediening van God moet ontvang, maar dan sal die oue eers moet sterf

1. DIE LIGGAAM VAN CHRISTUS IS NIE ‘N KERKGEBOU NIE

Die Lewende Bybel stel dit vir ons duidelik in

1 Kor. 12:27; “Wat ek vir julle wil verduidelik is dit: Julle almal saam is die liggaam van Christus en elkeen van julle is ‘n liggaamsdeel”

Hierdie teks in The Amplified Bible lees weer so: “Now you (collectively) are Christ’s body and (individually) you are members of it, each part severally and distinct - each with his own place and function.”

Lees ook: **Ef. 1:22.23** “En Hy het alle dinge onder sy voete onderwerp en Hom as hoof bo alle dinge aan die gemeente gegee, wat Sy liggaam is”
Kol. 1:18 “En Hy is die Hoof van die liggaam, naamlik die gemeente”

2. HOE KOM ‘N MENS IN DIE LIGGAAM VAN CHRISTUS?

Volgens **1 Kor. 12:13** “plaas” die Gees van God ons in Sy liggaam (die gemeente) Dink aan Paulus. Na sy Damaskuspad ondervinding het die Heilige Gees hom ingeplaas in God se kerk

Hierdie “inplaas deur God se Gees” is wanneer ons tot bekering kom en ‘n kind van God word. Ons praat ook hier van “wedergeboorte” volgens wat Jesus in Joh. 3:3-5 gesê het.

The Living Bible stel dit soos volg: "But the Holy Spirit has fitted us all together into one body. We have been baptized into Christ's body by one Spirit and have all been given that same Holy Spirit".

Dit is dus verkeerd om by 'n gemeente aan te sluit.

Ons moet seker maak dat God ons bygevoeg het tot 'n gemeente.

Indien dit gebeur sal mense nie so maklik 'n gemeente verlaat nie.

3. ELKEEN IN DIE GEMEENTE MOET BESEF DAT HUL VIR GOD BELANGRIK IS. DAAROM MOET ONS WAAK TEEN VERWERPING
1 Kor. 12:15-17 *"As die voet sou sê: Omdat ek nie die hand is nie, behoort ek nie aan die liggaam nie – behoort hy daarom nie aan die liggaam nie ? En as die oor sou sê: Omdat ek nie die oog is nie, behoort ek nie aan die liggaam nie – behoort hy daarom nie aan die liggaam nie ? As die hele liggaam oog was, waar sou die gehoor wees ? As dit geheel en al gehoor was, waar sou die reuk wees ?"*

Daar is "voete" in die gemeente wat die evangelie uitdra

Rom. 10:15 bring aan ons hierdie boodskap: *"Hoe lieflik is die voete van die wat die evangelie van vrede verkondig, van die wat die evangelie van die goeie verkondig."* ONTHOU: ALMAL IS NIE VOETE NIE

Daar is "hande"- Mense wat letterlik met hul hande werk vir God! Almal hoef dus nie predikers te wees nie

Daar is "ore" - Hulle wat kan luister na die nood van ander. Ons het voorwaar "ore" nodig in die gemeente. Miskien meer "ore" as "monde". Ons het mense nodig wat bereid is om te luister na die nood van hul medegelowige.

4. DIE LEDE IN DIE LIGGAAM (GEMEENTE) HET MEKAAR NODIG
 Lees: 1 Kor. 12:21-26;

Watter deel van u liggaam het u nie nodig nie? Miskien sal u dink dat u kleintoontjie nie belangrik is nie? Dan moet ek u reghelp deur u daarop te wys dat u sonder hierdie toontjie die balans in u voet sal verloor

Baie lidmate voel nie belangrik in die gemeente nie omdat hulle nie die "groot en belangrike dinge" in die gemeente doen nie - ja, hulle voel soos 'n klein toontjie! Dit is hulle wat baie keer die balans in 'n gemeente bring. Omdat ons mekaar nodig het mag ons nie mekaar aanklae nie - dit is in elk geval die duiwel se werk! (Op. 12:10,11) Ons het geen reg om my broer of suster "af te skryf" nie.

KYK WEER MOOI NA VERSE 25,26; EN BESLUIT IN JOU HART OM WAARLIK LIGGAAM VAN CHRISTUS TE WEES Ja, mense moet getrek word na ons gemeente wanneer hul die liefde van God daarin sien dat ons van harte mekaar bedien

5. VOLGENS 1 KOR. 12:18; HET GOD MY VIR 'N DOEL IN SY GEMEENTE GEPLAAS. MY TAAK IS NOU OM TE ONTDEK WAARVOOR EK TOT DIE GEMEENTE GEVOEG IS

WATTER ROL SPEEL LOFPRYsing EN AANbIDDING IN GROEI ?

Aanbidding moet by ons 'n lewensstyl wees indien ons ware groeI in die Kerk wil sien

Kom ons lees met aandag **Ps. 103:1-12** en dan antwoord ons die vraag:
Waarom moet God geloof word ?

1. Omdat Hy ons sondes vergewe het. Ps. 103:2, 3 en 12

“Loof die Here, o my siel, en vergeet geeneen van Sy weldade nie ! Wat al jou ongeregthede vergewe, wat al jou krankhede genees,....So vêr as die ooste verwyderd is van die weste, so vêr verwyder Hy ons oortredinge van ons.”

Dank jy nog God dat Hy jou sondes vergewe het ? Jy moet nooit jou dank teenoor God hiervoor verloor nie.

Wees ook dankbaar vir Sy genesingskrag. Hy het sekerlik vir jou en jou gesin wonders gedoen. Loof Hom daarvoor en moet dit nooit vanselfsprekend aanvaar nie.

2. Wat ons verlos het uit die mag van die bose . Ps. 103:4

“wat jou lewe verlos van die verderf, wat jou kroon met goesdetierenheid en barmhartighede.”

Verstaan jy Kol. 1:13? “Hy wat ons verlos het uit die mag van die duisternis en oorgebring het in die koninkryk van die Seun van Sy liefde ”

3. Omdat dit net Hy is wat ons siel kan versadig. Ps. 103:5

“wat jou siel versadig met die goeie, sodat jou jeug weer nuut sal word soos die van 'n arend.”

4. Lees Ps. 103:6,8,9 in “The Living Bible”

“He gives justice to all who are treated unfearly”

“He is merciful and tender towards those who don't deserve it. He is slow to get angry and full of kindness and love – He never bears a grudge, nor remains angry forever”

Die Boodskap stel die tekse soos volg: *“Die Here help almal wat onderdruk word. Hy is goed. Hy sorg dat reg aan hulle gedoen word.....Die Here se hart is baie sag. Hy gee graag goeie dinge aan ons. Hy is geduldig. Hy het sy kinders baie lief. Die Here sal jou nie aanhou straf vir die verkeerde dinge wat jy gedoen het nie. Ook bly Hy nie vir altyd kwaad oor iets nie.”*

Is hierdie nie genoeg rede waarom ons gedurig God moet loof en prys nie ?

LEES OOK PSALM 150

Hierdie Psalm gee vir ons die antwoord op 4 belangrike vrae:

1. **WAAR** moet God geloof word ? Vers 1
2. **WAAROM** moet God geloof word ? Vers 2
3. **WAARMEE** kan God geloof word ? Verse 3 tot 5
4. **WIE** moet God loof ? Vers 6

WAT BETEKEN LOFPRYSING AAN GOD ?

*“Lofprysing is om die voortreflikhede van God uit te spreek.
Om die hoedanighede van God op te hemel en te prys !”*

ONS HOOFDOEL VIR ONS BESTAAN IS OM GOD TE AANBID !

Geen bediening of funksie wat ek in Sy kerk doen, moet belangriker wees as dat ek God moet *aanbid* nie.

Baie gaan kerk toe en neem deel aan 'n ritueel. **Maar God soek ware aanbidders wat Hom in Gees en in Waarheid sal aanbid ! (Joh. 4:23, 24)**

Die woord “**Aanbidder**” beteken: “**hartstogtelike vereerder**”

Joh. 4:24 In die Lewende Bybel: “God is Gees, en die wat Hom wil aanbid, moet gelei word deur die Heilige Gees en met 'n eerlike hart bid. “

Nuwe Vertaling: “God is Gees, en dié wat Hom aanbid, moet deur die Gees en in waarheid aanbid.”

Dit is duidelik dat God sulke mense soek. Indien iemand na iets soek, dan het Hy 'n behoefte daaraan. Aanbidding is wanneer alles wat ons is, reageer op alles wat Hy is. Aanbidding is ons reaksie op die teenwoordigheid van God, sodra ons bewus word daarvan.

DIE 7 HEBREEUSE WOORDE VIR LOFPRYSING:

In die Bybel is daar 7 Hebreeuse woorde vir Lofprysing. Israel het dus presies geweet wat van hul verwag was as hulle die woorde Lof en Prys geles en gehoor het .

**Ons verstaan aanbidding soos wat ons grootgeword het om dit te verstaan !!
Kom ons kyk na die volgende woorde:**

1. HALLAL

Hierdie woord kom ongeveer 100 keer voor in die Ou Testament. Een-derde vind ons in die Psalms.

Hallal beteken: Om te roem; op te hemel; te spog; groot te praat; te vier; te herdenk; om uitbundig verspot te wees.

Die woord Halleluja kom hiervan. Die woord “*halleluja*” het geen taalgrense nie en word in al die tale op dieselfde manier gebruik.

Halleluja is die spontane uitroep van 'n persoon wat opgewonde is voor en oor God !

2. **YADAH**
“Om met uitgestrekte hande God te aanbid”

Het jy dit al gedoen ?

Waarom hande ophef ?

- Iemand steek hande op as hy oorgee. Maak soos Jeremia in Jer.20:7,9
- Iemand se hande word opgelig as hy wen. Dink aan 'n bokseveg.

Ons is mos meer as oorwinnaars en het rede om ons hande op te hef na God wat ons die oorwinning gee.

3. **TODAH**
“Uitgebreide hande in bewondering”

Wat sê die Bybel van **opheffing van hande** ?

Ps. 63:5 “So sal ek U prys my lewe lank, in U Naam my hande ophef.”

Ps. 134:2 “Hef julle hande op na die heiligdom, en loof die Here.”

Ps. 141:2 “Laat my gebed soos reukwerk voor U aangesig staan, die opheffing van my hande soos die aand-offer.”

Lees gerus: Neh. 8:6,7

4. **BARAK**
“Om God te verklaar as die oorsprong van alles”

Een van die treffendste gedeeltes in die Bybel waar Barak looffers aan God gebring was, vind ons in 1 Kron. 29. ‘n “Barak” loffer raak gewoonlik ons besittings.”

Luister: Jy kan nie net lof aan God bring met leë hande nie. Kom ons kyk na die skrifgedeelte in 1 Kron. 29 en sien hoeveel gegee was aan God as deel van aanbidding.

- Die opskrif – vers 1 : Maak 'n studie van die hoofstuk.
- Vers 3 – Het jy 'n behae in die huis van God?
- Vers 4 – Kyk na Dawid se voorbeeld. Die Nuwe vertaling vertel ons wat Dawid bereid was om te gee as sy “Barak loffer” aan God.
“Honderd-en-drie ton goud, van Ofir se goud, en 240 ton gesuiwerde silwer.” (Teen vandag se pryse het Dawid R700 miljoen se goud gegee.)

Om jou te help om die waarde van die goud en silwer uit te werk gee ons die volgende inligting: 1 Talent is gelyk aan 125 pond

Onthou: Daar is 14 onse in **een pond goud**

The Living Bible noem syfers soos:

- 85 miljoen Dollars se goud
- 145 miljoen Dollars se silwer

Die Leiers gee 171 ton goud asook 342 ton silwer (vers 6,7)

Geen leier kan God se volk lei as hy nie bereid is om die voorbeeld te stel deur te gee vir God se werk nie.

Laat dit wat jy gee aan God 'n lofprysing wees uit jou hart.

Dit is redes soos bogenoemde wat my oortuig dat geen gemeente kan groei indien lofprysing en aanbidding aan God nie 'n ernstige saak vir hulle geword het nie.

5. **TEHILLAH**

Dit beteken: “Om met sang God te loof”

Ps. 22:4 “Tog is U die Heilige wat woon onder die lofsange (Tehillah) van Israel” Vir hierdie rede behoort ons 'n singende volk te wees.

Israel het 4000 voltydse lofsangers gehad **1 Kron. 23:3-5**.

Die sangers het hul dorpe om Jerusalem gebou, om naby die tempel te wees **Neh. 12:29**. “want die sangers het vir hulle dorpe rondom Jerusalem gebou.”

Ps. 100:4 sal ons beter verstaan as ons na die oorspronklike Hebreeuse woorde kyk in die teks: “Gaan Sy poorte binne met **lof** (Todah = Uitgebreide hande in bewondering) Sy voorhowe met **lofgesang** (Tehillah = Met gesang) **Loof Hom** (Yadah = Opheffing van hande) **Prys Sy Naam** (Barak = Prys Hom met iets tasbaar omdat Hy die oorsprong van alles is!)

6. **ZAMAR**

“Om op snare van instrumente God te loof”

M.a.w. om jou vreugde en dank teenoor God deur musiek uit te druk.

Die volgende instrumente was gebruik om God te loof:

- Trompette Num. 10:10
In 2 Kron. 5:12-14 vind ons 120 predikante wat God loof met trompette
- Sifers
- Harpe
- Tamboeryne
- Bekkens (slaginstrumente)
- Simbale

Die Bybel verwys selfs na “kragtige instrumente” wat gebruik was om God te aanbid. **2 Kron.30:21**

2 Kron. 34:12 praat van hulle wat “verstand gehad het van musiekinstrumente”

1 Kron. 25:6,7 praat van 288 “geoefende” persone wat “meesters” was in musiek.

7. **SHABACH** **“Luidkeels uit te roep”**

Dit is duidelik dat ons hoorbaar lof aan God moet bring. **Heb. 13:15** “Laat ons gedurig (beteken dag en nag) deur Hom aan God ‘n loffer bring, dit is die vrug van die lippe wat Sy Naam bely”.

Ps. 34:2 “Ek wil die Here altyd loof; Sy lof sal altyddeur in my mond wees.”

Ps. 126 “Toe is ons mond gevul met gelag en ons tong met gejebel.”

Met die hart glo ons en met die mond bely ons. Heb. 10:9,10

Luister: Daar is krag in “Shabach”

So het Jerigo se mure geval. (**Jos. 6:20**) Teen watter mure moet jy “Shabach”?

Dit was met lof aan God dat Josafat die oorwinning teen hul vyande behaal het. **2 Kron. 20:1-26**

Besluit om ‘n Lofprysser en ‘n Aanbidder te wees !

Net soos die Tabernakel in die Ou Testament ‘n woonplek van God was – so is ons as gelowiges die woonplek van die Heilige Gees.

Ons is God se Tempels. 2 Kor. 6:16; “Want julle is die tempel van die lewende God soos God gespreek het: **Ek sal in** hulle woon en onder hulle wandel”.

Voordat jy verder kan beweeg in jou aanbidning tot God, hoe lyk jou **Reukoffer-altaar?** M.a.w. Jou gebedslewe ?

BAIE WIL AANBID TERWYL HULLE NOG MOET LEER OM TE BID !!

- Ons **gebedes** voor God is soos reukwerk – Op.8:3,4.
- As ek hoor hoe iemand **Bid** dan weet ek hoe hy **Aanbid**.
- As jy in ‘n huis kom sal jy weet of daar gebid word omdat gebed ‘n aangename geestelike geur versprei.

INDIEN JY NOG NIE ‘N AANBIDDER GEWORD HET NIE, LUISTER HIERNA:

God soek ware aanbidders.

Joh. 4:23,24; “Maar daar kom ‘n uur, en dit is nou, wanneer die ware aanbidders die Vader in gees en waarheid sal aanbid; want die Vader soek ook mense wat Hom só aanbid. God is Gees; en die wat Hom aanbid moet in gees en waarheid aanbid.”

Meld asseblief aan!

WAT SAL GEBEUR AS GOD GEPRYS WORD?

1. Die Here sal by die gemeente byvoeg die wat gered is. (Hand. 2:47)

God het 3 000 bygevoeg op Pinksterdag en 'n paar dae later 5 000 (Hand. 4:4)
Ware lofprysing sal nie mense wegjaag nie, maar eerder mense trek na ons dienste.

2. God se heerlijkheid sal die kerk vul. (2 Kron. 5:13,14)

3. Jou probleme sal van jou ontslae raak. (Jona 2:1-10)

4. Ons vyande sal verneder word. (2 Kron.20)

'n Evangelis hou dienste in Parow (Kaapstad) se Burger sentrum.

Hy vertel aan my dat hy nie eers sy bybel kon lees voordat hy gepreek het nie. Die letters het net eenvoudig bly beweeg voor hom. Reg voor in die saal het twee spiritiste gesit wat hom probeer bind het. Maar toe God se volk lofprysing aan God gebring het, het die heerlijkheid op almal neergedaal en die spiritiste het self hul klere begin skeur en uit die saal weggehardloop. Tot laat daardie nag is mense nog gevul met die Heilige Gees!

5. Mense om jou sal ook bevry word as jy God prys (Hand.16:25,26)

'n Paar lesse uit Hand. 16:

1. 'n Ware Lofpryser ken geen selfbejammering nie.(Kyk hoe tree Paulus en Silas op)
2. As jy opreg God prys sal selfs hulle wat in sonde leef na jou wil luister.
3. Die deure van almal het oopgegaan.
4. Die geregsdienaars het hul kom uitlei uit die stad, voor almal.
(Hand. 16: verse 35-40) **Jy sien, lofprysers is altyd in beheer.**

WAT VAN GEBED ?

'n Gemeente sal groei as hulle kan Bid

Dank God vir die krag van gebed
Dink maar aan Bybelse voorbeelde wat deur gebed bereik is.

Die Rooi See is gekloof deur gebed
Leeus se bekke gesluit deur gebed
Hiskia ontvang 15 jaar by sy lewe deur gebed
Elia bid vuur uit die hemel en reën (Hy bid eenmaal vir die vuur maar 7 maal vir die reën)

ONS GEBEDE IS VIR GOD KOSBAAR.

Op. 5:8 “En toe hy die boek neem, val die vier lewende wesens en die 24 ouderlinge voor die Lam neer, elkeen met siters en goue skale vol reukwerk, wat die gebede van die heiliges is.”

Dawid roep ook uit in Ps. 141:2; “Laat my gebed soos reukwerk voor U aangesig staan, die opheffing van my hande soos die aandoffer”.

Geen wonder dat die Woord vir ons sê dat ons **sonder ophou** moet bid.

1 Thes. 5:17 “***Bid sonder ophou***”

Luk. 18:1 “***Die mens moet gedurig bid en nie moedeloos word nie.***”

Wat is gebed?

Dit is 'n gesprek met God! Daarom is dit 'n dialoog en nie 'n monoloog nie. Ek praat met God, maar luister dan weer dat Hy met my praat. Hy praat met my in my hart deur Sy Gees en deur Sy Woord.

'n Gemeente wat kan bid sal God se hand in beweging bring !

2 Kron. 7:14 “En (as) My volk, oor wie My naam uitgeroep is, hulle verootmoedig en bid en My aangesig soek en hulle bekeer van hulle verkeerde weë, dan sal Ek uit die hemel hoor en hulle sonde vergewe en hulle land genees”.

Dr. Paul Y Cho, die pastoor van die grootste kerk op aarde in Seoul, sê dat hulle kerk in 'n krisis was in 1969 tot 1973. Hulle het gebou aan hul 10 000 sitplek-kerk en 'n blok woonstelle. Die dollar het geval en die olieboikot was aan die gang. Lidmate het hul werk verloor - bangkrotskap het hulle in die gesig gestaar!

Die duiwel het vir hom gesê om homself om die lewe te bring deur van die woonstelblok af te spring! Toe gaan bid hy in die bedompige kelder by hul gebedsberg - die gemeente het saam gevas en gebid. God het uitkoms gegee! **Die hemel is nou oop bo Korea - duisende mense word gered.**

IS DAAR NOG BEGINSELS WAT ONS MOET WEET SODAT ONS AS GEMEENTE KAN GROEI ?

Ek wil met jou deel wat vir my belangrik is.

1. **KRY GOD SE ORDE REG IN JOU HUIS !**
GOD EERSTE; DAN DIE MAN AS DIE HOOF VAN DIE HUIS; DAARNA DIE VROU; DIE KINDERS; DIE GEMEENTE EN DIE WÊRELD DAARBUITE.
Het jy geweet dat God Moses wou doodmaak omdat God se orde nie reg was in sy huis nie? Ex 4:24-26
2. **KRY JOU VERHOUDING REG MET GOD (en hou dit reg!)**
Dit vind plaas deur GEBED en BYBELSTUDIE .
Dr Yonngi Cho het gesê: “n Leier wat nie bid nie, behoort nie God se volk te lei nie. Hy moet terugstaan as leier.”

Selfs Jesus het Homself afgesonder in gebed.

Mark. 6:46 *“En nadat Hy van hulle afskeid geneem het, het Hy na die berg gegaan om te bid.”*

Luk. 6:12 *“En Hy het in daardie dae uitgegaan na die berg om te bid en die nag in die gebed tot God deurgebring.”*

Luk. 5:16 *“Maar Hy het Hom in verlate plekke teruggetrek en gebid.”*

3. **KRY JOU VISIE (Jou Passie) DUIDELIK IN JOU HART EN SKRYF DIT NEER.**
Hab.2:2 (King James vertaling) “Write the vision, and make it plain upon tables, that he may run that readeth it.”
Spr.28:18 vertel ons dat as daar geen openbaring of visie is nie dan word ‘n volk bandeloos. Die Spaanse Bybel sê: *“Dan word hulle soos wilde perde”*

JOU VISIE MOET:

1. **Groepsgebonde** wees. Daarby bedoel ek dat jy seker moet maak dat hulle met wie jy saamwerk die visie, wat ontvang is van die Here, hulle eie maak.
2. **Tydsgebonde** wees. Daarby bedoel ek dat jy (julle) moet God vertrou dat hierdie visie in ‘n sekere tyd bereik sal word.
3. **Meetbaar** wees. Daarby bedoel ek dat jy (julle) kort-kort die vordering t.o.v. die visie moet kan meet om vas te stel hoe gevorder is.